


NEWS CLIPPING – PRESS

CLIENT: DSA EXHIBITION AND CONFERENCE
PUBLICATION: BHARIAN.COM.MY SECTION: NASIONAL
DATE: FRIDAY, 24 JANUARY 2020 PAGE NO.: 2 PAGES
HEADLINE: MAT SABU, PRABOWO BERTEMU BINCANG HAL KESELAMATAN SERANTAU
URL: <https://www.bharian.com.my/berita/nasional/2020/01/649700/mat-sabu-prabowo-bertemu-bincang-hal-keselamatan-serantau>



BERITA SUKAN DUNIA HIBURAN BISNES RENCANA WANITA HUJUNG MINGGU BH KAPSUL

BERITA » Nasional
Jumaat, 24 Januari 2020 | 7:52pm



Mohamad mengadakan kunjungan hormat jke atas rakan sejawatnya, Prabowo di Jakarta, Indonesia.

Mat Sabu, Prabowo bertemu bincang hal keselamatan serantau

KUALA LUMPUR: Menteri Pertahanan, Mohamad Sabu bertemu rakan sejawatnya, H Prabowo Subianto di Indonesia, hari ini.

Dalam satu kenyataan dikeluarkan Kementerian Pertahanan, kunjungan balas Mohamad ke Indonesia bagi membincangkan hal berkaitan kepentingan hubungan dua hala dalam usaha menguatkan aspek keselamatan kedua-dua negara, selain mengeratkan hubungan diplomatik.

Ia sekali gus mencerminkan hubungan pertahanan Malaysia-Indonesia yang kuat dan dinamik.

“Kedua-dua menteri mengadakan perbincangan yang luas dan terbuka, sekali gus mencerminkan kekuatan hubungan dan perkongsian kepentingan antara dua negara. Mereka mengulangi komitmen bersama bagi mengukuhkan kerjasama pertahanan yang sedia ada berdasarkan kepentingan bersama, terutama membabitkan kerjasama pembangunan industri pertahanan.

“Oleh itu, Mohamad sempat menyerahkan jemputan kepada Prabowo untuk menghadiri Persidangan dan Pameran Perkhidmatan Pertahanan Asia (DSA 2020) serta Pameran Antarabangsa Keselamatan Kebangsaan 2020 (NATSEC 2020) dijadual berlangsung pada 20 hingga 23 April ini di Kuala Lumpur,” menurut kenyataan itu lagi.

Kenyataan itu juga menyebut, pertemuan kedua-dua menteri itu turut menyentuh kejadian penculikan yang berlaku, baru-baru ini, membabitkan lima nelayan Indonesia di perairan Tambisan, Sabah.

Kedua-dua menteri menyatakan keyakinan mereka terhadap pelaksanaan Perjanjian Pelaksanaan Trilateral (TCA) yang berkesan antara Indonesia, Malaysia dan Filipina.

Memetik kenyataan itu, ia antara langkah dalam menangani ancaman keselamatan maritim di perairan yang bersempadan dengan negara pantai.

“Mohamad juga memberi penekanan terhadap kesungguhan dan jaminan komitmen Malaysia khususnya Angkatan Tentera Malaysia (ATM) dalam mengamankan kawasan.

“Kedua-dua menteri bersetuju bertemu dengan Setiausaha Pertahanan Filipina, Delfin Lorenzana di luar penganjuran Mesyuarat Menteri-Menteri Pertahanan ASEAN (ADMM) pada Februari 2020 untuk membincangkan lanjut langkah meningkatkan TCA,” menurut kenyataan itu.

Mengenai hubungan pertahanan Malaysia-Indonesia, menurut kenyataan itu, ia menyaksikan kemajuan yang sangat baik di bawah Mesyuarat Jawatankuasa Am Sempadan (GBC) sejak platform sedemikian ditubuhkan pada 1972 antara ATM dengan Tentera Nasional Indonesia (TNI).

Selain itu, kenyataan itu menyebut, hubungan pertahanan juga diperkuatkan melalui inisiatif sub-serantau iaitu Kawalan Selat Melaka (MS) dan TCA bersama Filipina.

“Malaysia dan Indonesia berkongsi hubungan dua hala yang rapat dan kunjungan ini penting sebagai langkah memperkukuhkan hubungan persahabatan antara kedua-dua negara,” menurut kenyataan berkenaan.